

國朝畿輔詩傳

國朝畿輔詩傳卷三十四

長洲陶 樸 梟 薌 輯

錢塘吳長卿更生校

邊連寶

連寶字肇吟號隨園任邱人中寶弟雍正十三年拔貢生乾隆元年薦舉博學鴻詞有隨園詩

草八卷

四庫全書提要隨園詩集十卷附錄一卷邊連寶撰是集前有乾隆丁丑戈濤序而第四卷以下題曰病餘草者爲戊寅以後詩蓋續編而仍冠以原序也附錄一卷曰禪家公案頌則其晚耽禪悅讀指月錄所作云

蔣士銓傳君世爲任邱望族生稟宿慧博聞強記康熙己亥補博士弟子員雍正乙卯受知學

使錢公陳羣充拔貢生明年乾隆改元開博學
鴻詞科錢公舉君應召試不中越十五
年朝延徵經學之儒錢公再舉之是時天下
共舉三十九人君獨以疾辭不赴歷鄉試十三
次凡五薦而罷遂絕意進取益肆力于學所著
古體文隨園詩病餘草病餘續草絕筆草各若
干卷其評選手定者則有五言正味集杜律欣
蒙管子牒考訂蘇詩施注等帙君眉目疏秀性
簡介不喜見俗士論事侃侃持義理不移少嗜
酒晚號茗禪居士與河間戈濤最友善濤于詩
文慎許可願心折于公嘗爲公撰生傳爲時傳
誦濤旣死君屏交遊惟與兄竹巖詩酒唱酬白
頭友愛如髮齡時竹巖子廷掄官兩淮鹽運使
竹巖就養江南偕君往遊窮大江南北名勝歌
吟弗輟旗亭僧壁傳寫殆遍君詩益奇橫跌
宕自喜編南遊瑱篋集歸一載卒年七十四
又序河間詩人自劉文房振起瀛海作者代興
先生詩脫絕町畦戛然獨造才識遼衍氣力宏
放不名一家而其言有物誠有合乎風騷之旨
然君之所得尙有伏而不見者豈特盡於此詩

而已乃知先生所以求傳于後世者故有在也

戈濤序余嘗論隨園詩以韓孟爲宗七言歌行兼有青蓮玉川子今更讀之以爲不然隨園之詩自成爲隨園已矣隨園詩縱橫排募不可方物而各有一隨園者存卽其晚年深造自得其剛果之氣不能自沒於冲夷淡寂中此隨園之眞其骨近韓其神近孟其氣近李其情思近盧惟其近之是以似而有之至謂

某篇學某某篇則斷斷無有

杭世駿詞科掌錄肇眇爲直隸總督彭城李公所薦研辨經史篤學不倦北方學者未能或之也

鶴徵錄肇眇學問淹貫爲吾鄉錢文端所知已已文端時爲少司寇卽以沈潛經學薦之香樹齋集中有任邱代東邊鴻博句云好賣文園賦會懷光範書隨園集末附錄禪家公案一卷則其晚年頗耽禪悅也

錢陳羣過任邱喜晤邊肇珍賦有鳥一篇爲贈
一抹疏林瀛鄭連高城隱隱夕陽邊夢中握手
三千里月下來投十二年鶴髮尙書攜舊履雞
棲處士臥寒瓊重來昔日譚經地有鳥懷人是
信天

紅豆樹館詩話先生姪霽峯都轉官揚州先生
來游適蔣心餘太史主講永安書院心餘與先
生同爲錢文端公門下士霽峯又與心餘會試
同年今隨園詩草入卷皆經心餘太史甄定而
霽峯都轉所刊行也忠雅堂集中有用東坡岐
亭韻與先生唱和詩其題隨園無雙譜詩後七
古一章推服尤至詩云無雙譜中四十客始于
爾侯終信國畫者詠者金古良久詩壇誇絕
特任邱丈人耐不得萬事參差塞胸臆金剛神
勇菩薩心放出獅王真氣力老吏斷獄誰敢移
比例森嚴刑賞直拄天撐地筆一枝誅殛奸回
發潛德肺肝千載不能藏魂魄九原無處匿短
兵相接妙入神棄巾如山俱敗北想當淋漓下
筆時西崖鐵崖都變色讀書萬卷乃有神此事

平生幾胎息吁嗟乎不須更看無雙譜翁有無
雙新樂府作詩何異作春秋三千餘歲上下古

冬夜讀書

人嫌冬夜長我愛冬日短道心逐晝消俗腸憑夜澣
墮戶折風刀室隙拾月卵焚香驅穢濁數息調驟緩酸醎
生櫟枰苦馨嗅薜椀抱膝覓新吟蘸筆竄舊纂冥理探
幽磻古義抵微窹竇塞人迷方機發灰動琯似遠忽乍
親將來還中斷眉蹙方詰屈顏齏已平坦讐初慘申韓
契終踰鮑管韜精難覆藏謫態自輸款斑管絕疑讀牙
籌斷潤算稍疲支離腮助勇噉餅餽吟弄愜新歡做睨
抒宿懣尺尋勿已而寸進又豈但離羣絕庸攀追古務

刻鵲畢箕收柄舌牛女欲漱盟煥酒且孤斟裏書不再
攤膏油費夜煎妻孥糾畫幰

贈別潘晉逸

與君敦古處相好如弟昆固非以富貴亦不以賤貧結
交自有道形蹟非所論憶昔初識面祇在傾蓋間君謂
我免俗我謂君不羣暗中兩摸索遂成膠漆緣我時來
上谷徑直造君門君見輒大喜洋洋動面顏臥我以牀
榻飲我以酒尊君時出門去阿婦供饔飧阿婦亦賢慧
知爲君所親殷勤具盤膳黽勉典釵裙世上同懷者邈
若越與秦同懷而相好豈復加此云我上有老母爾亦

有叢親我今被徵召別爾入都闈爾亦膺薦辟轉盼入
霄雲相期各努力以慰堂上人

雜感

同雲色沈沈陰風鳴策策霜霰隨風零稍稍入窗隙
暗僅照幃火寒不暝席中有兀坐人慘慘心不懌趨時
志不宜謀道身則瘠二者將奚從交戰令心窄守賤非
近遭歸愚亦前畫千秋鑒此誠頗領奚足惜

身世何莽莽中心亦怏怏嘉遇不一來駛年動屢往撫
事抱真悲觀生淡奢想衰白復益今意氣頓殊曩取酒
澆我愁我愁逐酒長由來近日愁非酒能滌盪

霜風刷林木一夜淨如掃中有枯死蟬軀殼尙完好精
魄化異物但虛存其表爲爾涕洟瀾中心憂如擣逝者
盡如斯豈獨爾輩天

次昌黎縣齋有懷韻寄呈戈芥舟

聊敘吾平生用博子悲咤人腐乃誤儒年禋休罪稼稷
年穀不登腐儒福所謝拘囚隼在韝枯槁草染麝驅羸
將敝策絪驂欲息駕抱璞遭荊刑命名忝趙價前途險
已明後遇覆難射點鬼羸韓窮論詩輸李霸細述耳須
傾極擬言豈詐昔余年尙嬰先公世已下耽餓我無憐
招忌人有罵銜悲口生石迸淚目決灞嘗膽志逾堅坐

芒身少暇車螢朝徹帷蘇錐夜刺髀瑣瑣目已空嶽嶽
心能跨文思倅拾遺位欲極僕射千年鼓笙簧百世噉
嚙炙頻年遭棄遺壯懷成虛假悲塵淺南溟恨水低西
華深杯寡醒晨愁夢無歡夜彈冠慶遊揚推轂乏姻婭
登天纔拾階聳霄又斷軌忸怩稱陸尉拉雜燒李架鍛
翮在辰年點額歸丑蜡平通叨餘榮荒謬得寬赦有戰
卽遁逃無抵不隙罅涼宇蔭嚴冬燠館烘炎夏謀生計
已窮畫策籌難借去矣嗟何及來者吁可怕盛名悉已
熟佳什投非乍前讀旣已驚後誦旋尤訝八斗天自殊
一經家有藉浮雲任驥籜羊角足鵬化而我獨蓬蒿此

生老桑柘濡水可誅茅吾邱竝置榭抱膝非葛廬問字
豈揚舍隱霧慚豹潛銜鼠避鵑嚇隨緣亦小適非分不
妄趺坐觀涅槃鍊氣配嬰姤婉變不自媒媼嫗豈復
嫁

村居冬夜

戀枝有餘葉觳觫燥且乾微風一披拂墮地聲珊珊羈
魂寡所泊聞此亦悽酸悽酸竟何那甘飲長恨端
矮窗不受日黥黥如山陰風吹霜霰入寒氣迫我心五
臟無陽燄激爲酸苦吟酸苦奚足惜誰聆酸苦音
冬月光泠泠萬里碾寒玉木彫瘦影直森然一束束擁

鼻塗廣庭噤痒生寒粟凜然難久畱入戶仍躑躅

和芥舟秋日過茗飲之作

與爾結金蘭相好忘庚甲匪惟歷駟歡直同魚水洽感
激鼓應桴招邀風動簾有蓋必雙斟無韻能孤押牛耳
無定執雞壇亦屢歆互築累所卑交注餉厥乏義娥御
移西締綌衣更袷玉葉翦琉璃幪溪染韞韞韞靄覘萋
萋黛霖聆萋萋將迎倒屣履過從省筆劄汲泉熱搗杌
撻戶驅鵝鴨悶稽羽經裁愁免墮術歷憂伊蚓號穴砒
匄波轉峽甌淨還屢雪槍嫩只一招幽香但微吸元味
無重叩興酣結羶糊狂發肱篋匣飽李君讓池收龐我

在桺坐慚陶韋韻空點韓樊法

衡山圖

衡嶽鎮炎方掃空翠突兀祝融聳處尊絕頂指溟渤其
餘七十峯參差互凹凸拱揖盡朝宗圭璧赴金闕紫蓋
獨不然恥爲衆峯沒勢轉向東傾偃蹇嬾參謁欽爾烟
霞姿別具傲晚骨大度亦休休包荒無面訐文叔泊子
陵高風雨超越雷池乍隱微風穴忽飄颻雲氣湧洞中
知有仙靈窟恭惟魏夫人族姓本閭閻冥契耽真元塵
蹤棄堦墀託劍歛化形瑞靄捧羅幃紫虛位上真蠓蟻
頻嗟咄願充青鳥役永託仙壇樾故人寄此圖太歲在

單闕大旱金石流煩煥患暑渴披對已灑然雨腋涼騰
發陡將熱惱身提貯玉壺波清夢繞洞庭高興坐超忽
安得挂席遊擊汰臨滑笏帆勢隨湘轉九面望硤硤興
趣協滄洲瀟灑送日月無計出塵氛有懷空鬱勃極目
陟坡陀楚天拖一髮

苦雨書懷

淫霖苦無休日夜常相繼電光耀自他日影吐還蔽雲
霧入眼愁殷殷聒耳碎不耐捲簾看但爲移榻避新苔
漬衣履夙膏潤襪被烟鬱爨薪微螢化腐草積蔓涎蝸
黏屏高躍墓上砌迷壘燕棲櫳趁巢烏塌翅濃氛蔭綠

窗老眼怯細字苦妨雒誦勤稍取黑甜味方抱爲魚變
仍逞建瓴勢雷旋發震方雲更起兌地坐見天瓢傾遙
想銀塘沸牛馬辨已難螻蟻穴可潰版築檄村農巡邏
走津吏鄉國望欲迷音耗杳難寄寧親女願虛穫麥兒
蹤滯羈懷苦無悰清醪欣有餽三杯顏微頰一斗心已
醉挽鬚泥老翁含飴喚孩穉前庭聊游衍晚景頗蒼翠
堦樹氣龍薤盆池影搖曳吸露清肺渴解醒嗅荷氣豈
卽免憂煩暫用祛感喟

疊浪巖

小兒特狡獪作意弄奇巧戲將巖嶽崎疊爲浪浩淼峯

奔真若流瀾狂幸未倒愚公疑罷移精衛填竟了緣木
求鰈魚點波誤鳥虎豹雖遁藏蛟蜃愁俶擾誰將橋
三峽激上峯五老水衣破岡巒石髮像持藻堅不受犁
耨慎毋藝稷稻阮屐一任登許瓢未堪旨剛柔忽混合
融結互哀表雕鏤未云窮俗尤輒相勸坐覺詩腸枯也
緣酒喉燥拮據成短吟所幸無雷勦

彩虹鏡

傍巖小具區衆壑流所匯左右夾明鏡界以五彩縹波
光旣上漾雲影亦下墜川泳與雲飛居然兩易位苔磯
坐片時領畧濠濮意魚鳥來親人此心真有會

放歌行

星河牢落青天高長吟擊節悲且豪丈夫會應有變化
安得鬱鬱困蓬蒿君不見甯戚飯牛人不識短布單衣
無顏色叩角悲歌氣慨慷一朝奮起相齊國當其夜半
飯牛時安知大臣在牛側又不見淮陰尺蠖方跼蹐阨
遭梟獍惡少年胯下甘心受污辱乞食漂母尤堪憐謂
當早晚填溝壑龍驤萬里忽高驚漢王蕭相皆拱手煌
煌金印大如斗熊羆百萬供指揮滅齊下趙如拉朽我
亦湖海一壯夫昂藏七尺非侏儒若不致身青雲上羽
翼文治巖廊趨便應揮手謝人事騎鯨長嘯遊蓬壺胡

爲不仙亦不貴坐歛阮籍哭窮途空挾文字五千卷日
爲人作筆墨奴勸君且進一杯酒世上區區亦何有闔
閭城外虎氣騰延平津上龍精吼人間豈少尤賤官蛇
行匍匐牛馬走終當一語結深知坐取公卿如唾手

空城雀

不巢人家幕不穿人家屋不飲太液水不啄太倉粟生
長空城裏日暮空城曲王孫手挾金彈子上林鳥雀逐
彈死空城從不識金彈君道何如上林苑

將進酒

羲和轡斷望舒死烏兔兩丸跳不起昆明池畔聚劫灰

小兒彈指聲中耳昨上崑崙謁王母雞皮鶴髮成老醜
麻姑十指短且禿夢綠飛瓊都白首度索山頭仙果稀
東方曼倩被枷杻彭祖巫咸今在無漢寢秦封骨應朽
茂陵驪山堆黃土石馬彫零銀雁腐將軍誰是水中龍
丞相何如廁內鼠人間世上有夷跣黃泉地下無堯桀
斑斕蠹史賺羣愚窈窕螺杯藏俊傑鸚鵡杯鷓鴣杓莫
消停且斟酌遮莫胸中萬斛愁爲君方寸平華霍

沈石田蜀道圖

盤盤折折上九天裊裊娜娜下九淵中央斷絕兩峯峻
天梯石棧相鉤連竹筏縛橋駕深谷乘危馭朽寒生栗

天迴地轉雲氣昏
萬萬嘯號元猿哭
濊湑粉汙浩呼洵
千巖萬壑雷霆動
楓杉檣柏幾千株
蒙籠蔽翳何鬱鬱
中國入蜀有兩道
一爲峽江一劍閣
劍閣草昧自蠶叢
不比峽江爲禹鑿
蠶叢至開明三萬
八千歲人烟不與
中國通五丁力士
開蒙昧蒙昧雖已
開仍踞天下險李
白樂府有挂漏左
思蜀都空點染試
閱啟南此畫圖庶
幾毫髮無遺憾吃
口偷兒不足齒淋
鈴浪子殊可鄙千
載之下爲君愁憶
我窮酸杜子美同
谷歌罷入成都橐
囊橡栗攜妻子青
泥坂蜿蜒石櫃閣
巘岼大劍小劍崛
拔地五盤七盤迴
插天窮幽索隱歷
艱險始栽圓松營

水檻畫圖胡僅止于此不寫錦江浣花里

龍挂

老夫亭午飯方罷兒童喧呼看龍挂出門矯首向西南
大衆譁呶共驚詫隆隆之雷浩浩風龍腥來自風雷中
頭顱菌蠢尾蜿蜒衙衙掣攬撐虛空須臾鬚鬣紛駢駢
鱗中掣出金蛇火一聲霹靂飛上天空中疑有驪珠墮

贈戴通乾廣文用昌黎贈崔評事韻

作詩贈君苦不敏寸衷如縷攄難盡晤君兩度已十年
蒼茫身世殊堪軫憶昔識君丁未冬朔雲浩蕩風淒緊
蒙君惠我寶劍行陸剽虎兕水截蜃我時亦有贈君篇

蒲牢聲裏號蚯蚓掉斧班門我大愚投瓊報李君微哂
君時行李正困乏長篇磊落嚇俗尹峒裏鵝毛禦臘坻
坐令章甫縫掖窘蜣螂奪糞易蘇丸參差無怪相矛盾
自茲一別兩茫茫我埋輪轂君解朝已聞獻璞黔卞和
更見妒能刖孫臏越今乙卯再相逢各言所歷互矜閔
君困寒醴思奮飛我仍絳帳誰推引慙直輓美不相丁
方鑿圓柄難鬪筍可憐黑白太分明胡不知雄守其北
西北天駒自渥洼東南美幹富栝箇俱是天家有人材
但嫌生硬不柔忍衣裳楚楚笑蜉蝣枝葉榮榮憐糞茵
莫使真剛化指柔終教凡鳥怯疾隼

聖主當陽

御六龍閣澤旁流及動蠢物色行看起釣屠愁憂休令
彫肝腎丈夫遭際自有時豐約循環理自準清夜挑鐙
抱膝吟戀枝餘葉隨風墮天街鼓響自登閣大界月明
無域畛臨歧相勗崇明德千載休同草木泥

薄薄酒學山谷二首

酒薄薄如水婦醜醜如鬼酒薄如水存酒味一杯一杯
可取醉婦醜如鬼勝獨宿七十無妃傲犢收緩步可以
當車晚食可以當肉襦褐可以傲華袞蝸廬不必羨華
屋無辱何必有榮免禍勝如多福漆以飾割木以直伐
蘭以馨焚翠以采殺雄雞羽美自斷羽恐中犧牲登於

組靈龜之腸以靈刳安得曳尾在泥塗華亭鶴唳無望
矣東門黃犬得再乎吁嗟乎悲夫主父烹綠五鼎食衛
尉禍胎一斛珠何如酌薄酒擁醜婦歌呼嗚嗚其樂只
且

薄酒可以頰而醜婦可以補綻飲酒何必瓊漿娶婦何
必姬姜有酒有酒如澠淮不到劉伶墳上來銅雀臺高
美人舞西陵兩眼眯黃土印累累兮綬若若何如啟期
行帶索鳳笙鼙鼓龍吟笛何如歌聲出金石建牙吹角
下高堂翠旗羽纛凌風翔何如灞橋風雪驢子背巾角
奚奴古錦囊吾問之能加我於滕者能墜我於淵朝令

生羽毛暮令生瑕癥已矣乎富貴功名難強得董項陶
腰不可折不如薄酒飲足三萬六千日生與醜婦同室
死與醜婦同穴

讀長吉

紹述淹蹇魁紀公孫樵潦倒大明宮癖王身預甘露變
不合彫刻蝦蟆蟲隴西王孫李長吉萬象森羅供呼吸
奴背錦囊果下駒乾端坤倪盡收拾剡方剡圓鐫義舒
擔囊負篋走且趨造化小兒嗷嗷哭太乙列缺追亡逋
眞宰却被毛帚刷合將六極行誅殺那是緋衣駕赤虬
天遣耶又引羅剎詩卷百千萬億年浮生三百廿四月

君不見尋章摘句蠹魚翁厚福叢軀壽而達

讀義山

詩家大成集浣花含蓄百氏無垠涯大歷以後稍靡弱
剽掠勦襲空紛拏元白韓李名相亞元輕白俗喧淫哇
獨有昌黎玉溪叟杜陵鎔鑄雙鏤鈇下及北宋起異議
江西派別西崑家牛李蜀洛立門戶黨枯讐朽相疵瑕
余謂二子雖異派鉤盤簡潔分梳爬同出崑崙向碣石
仍歸一綫無等差荆公許李覲杜奧可云老眼無蒙遮
韓碑學韓便學杜籌筆雖杜其何加五言大篇愈雄渾
惶惑萬怪奔洪河勢如武鄉圖八陣烏蛇龍虎相攫撾

又如淮陰將百萬各就班部嚴謹譁其餘豔體不無謂
宜濾精液捐滓渣楚雨含情各有託注腳自下何明耶
擬似應絕段十二狹邪豈比溫八又余素主韓不主李
筆如牛弩私矜誇詎知韓體便枵腹中乾外強徒查牙
不持寸鐵白手戰終遭窘辱難騰那題詩跋後用自警
兼示學子持頽波

芥舟過訪

黃昏忽有高軒過當關報道河間戈倒曳屣履譏不結
出門諦視欣無訛精神頓豁積悶釋灑如四體離沈疴
粲然一笑攜手入寒溫禮數捐煩苛高呼稚子解巾帶

衣霑霧露泥污鞢鋪牀拂席置羹飯濁酒稍稍資顏酖
快談不覺天欲曙星斗磊落城烏吡清晨飯罷告欲去
脫軸取轄投寒波卻煖昨夜所餘酒一杯相屬聽我歌
丈夫在世稀會面來日苦少去苦多君應早晚入仕宦
不比老醜終巖阿祇今一歲纔一晤奚論他日岐關河
安得與君如歷駟出則聯步居同窠疾病老死不相棄
朝嘲暮咏紛遮羅坐令萬物受雕刻掇剔蓋載窮義娥
嗚呼人生得此死無恨何必清廟賡猗那

贈元敬之

靜海元子真豪士謂書但記人名耳因棄儒術學俠客

朱家郭解不足役萬里常求馬五花千金不惜骹一擲
酒痕醉墨滿弓衣夜來射殺南山石中年折節學爲農
躬耕何必不英雄未應豪氣除湖海豈合壯節棲蒿蓬
秋高馬健頭駮駮願君爲我洗寒餓平原一撒海東青
駕鵝坐向雲中墮弓如霹靂馬如飛耳後生風鼻出火

春歸

梨花零落桃花暮榆莢飛飛渡溪去東風似欲買春迴
亂撒沈郎錢滿路老夫攜杖逐東風抵死畱春春不住
一聲鶡鴒喚春歸試問春歸向何處

題高古狂指頭五鷹

霜刮天膜徹宿壅老木桮杈枝上聳豪鷹五輩何所來
西風萬里發秦隴一鷹振影摩青霄一鷹闕翼低黃茅
其餘三隻竝奇絕眼溢金光骹卓鐵參差上下立枝頭
猛氣雄姿蓄未發飛棲下上聯以眸五鷹相覷如有謀
聲勢互倚氣愈橫羣孱何以當清秋竹雞杉兔不足擊
溪虎野羊俱辟易圖南尙遇大鵬雛毛血應灑平蕪赤
古狂先生腕力邁米家老顛應遜籌蓮房帚尾屏不用
奇氣直出十指頭但寫野鷹意亦好恐將臂韉捐奇矯
君不見自古在昔出世雄誰從絛鏃營一飽

董德全過訪臨別贈以詩

董君精熟青鳥學，攜藝遨遊無住著。本將技術參妻孥，卻賤金刀重然諾。襤被疲驢燕趙間，曳裾跋履公侯前。倘逢慷慨賤貧士，爲卜牛眠不計錢。黃金如山買君願，君迺掉頭不肯住。問君抵死欲何爲，爲渠驕蹇無禮數。秋深訪我新安城，一夕論心萬古情。攀留數日不可得，攜手河梁淚滿纓。信陵君歿千年矣，更向何處覓知己。臨歧脫贈繞朝鞭，勸君歸老侯嬴里。

商喜八駿圖

八駿之名昉穆滿，後來畫手競奇罕。非羆非虎非後猊，詭形譎狀驚恆眼。竊意駿祇馬中傑，無勞作意爲怪幻。

商喜八駿祇是馬不過馬中之駿者權奇倜儻一何雄
骨格不出曹韓下一馬立睡兩馬齧兩馬狂奔仍互齧
一馬癢倩老樹搔後軒前輕尻爲高一老一穉爲子母
囁囁有聲飲母乳詭形譎狀復何有超妙入神自老手
雙耳四足蹄不方別有精神可不朽乃知古聖形體也
只似常人何必蛇身而牛首

任縣守歲

省覲來南國蹉跎逼歲華小兒看爆竹老母受盤花三
十明朝過歡娛此夜賒屠蘇聊共酌何事更長嗟

夜雨

風雨逼窮秋
瀟瀟晚未休
雁聲雲外溼
燭影夜深愁
有婦供多病
無人補敝裘
嚴霜明日降
南國夢悠悠

僻地

僻地人烟少
蕭晨物象清
天空孤鳥沒
日落遠山明
時序一何駛
吾心漸不驚
一杯桑落酒
憑仗送浮生

晚吹

晚吹蕩林薄
凌空一葉飛
天光寒已夕
雲影淡何依
歲月有遷遞
雪霜無是非
于中覓消息
斟酌可忘機

暮冬

紆鬱無欣趣
蹉跎逼暮冬
三餐須擘畫
一褐已蒙茸
壁

鑿鄰家火風來雪外春可憐班定遠當日亦書傭

孤雲

靜與玉蟾逐淡將銀漢同晚風吹不去天宇祇如空霖
雨知何日蕭條亦有終由來無住著呼吸任鴻濛

懷友八章 選五

劉司州

抵死讐紈袴謀生去井疆或能辭顯領直可閱炎涼砧
杵千家月蕭疏兩鬢霜饒君多道力容易耐迴腸

高用賓

里選曾推轂花封再剖符邊疆鄰象卉異產駭豬猯萬

里風波險三年歲月徂北堂雙白髮夢繞洞庭湖

夏西村

每向朋儕內憐君是古歡衣冠存儉樸耕鑿識艱難晚
節甘淪落低頭惜羽翰西郊游賞處偏憶酒杯寬

王希陶

窮瞽囚張難丹青老鄭虔清癯骨一把脫灑句如仙自
判河津郡相違十七年滄州舊隸河間每于試期相晤
自雍正己酉後改屬天津于今
十七年矣邇來消息斷翹首海西偏

李露園

向作神交客今為夢裏人廿年纔會面十載又沾巾迢

遞弓高道蕭條青女晨偶拈春草句紆鬱氣難伸

見懷詩有

相期春草下吟鞭之句

村居九日

步履秋沙輭登高暮景寒霜澄波色淨風戰葉聲乾白
酒緣初斷黃花興未殘空餘筋力在何處好追歡

秋蝶

蝶影下花藥花秋蝶亦秋粉沾朝露溼翎帶夕陽愁香
藥一生活清霜八月休秦宮應不悔老死在溫柔

讀李鐵君集

爭琶喧末俗久已闕瑤琴夫子篤於古遺音乃在今心

游懷葛上蹟屏巖泉深日暝烟嵐重孤蹤何處尋

初秋雜興

勲業烏頭外光陰羊胛中百年隨露電萬事付苓通暑
謝疏團扇涼歸驗候蟲已拚虛牝擲不遣酒盃空

蛩吟苔覆草條躍水明沙棗實垂簷角籬梢綻豆花薄
遊隨竹杖樂事數田家他日菟裘老陽坡好種瓜

鄙人忙爲口澤國味多腴帶乙烹魚婢和匡矐婢奴推
恩到臧獲同室得歡娛笑問鳴鐘者雙匙得插無

妙響慚龍尾奇癡似虎頭吟成裁錦貯釀熟脫巾筠擬
入焚香浦時登曝畫樓聊從吾所好身世任悠悠

野望

秋色鬱崢嶸秋天一雁橫
荒烟迷古戍落日淡孤城
身世隨蓬轉愁懷逐望生
哀笳何處發淒切不勝情

秋夜

敗葉窗前墮孤鴻天外驚
寒鐙耿獨夜老耳怯秋聲
架上書空帙牀頭劍不鳴
霜中餘促織札札竟何成

登穀

儉薄微登穀蕭條又履霜
年荒偏健飯歲暮未縫裳
籬菊欣初綻沈疴得小康
一尊聊獨遣何必待重陽

秋盡

秋盡百蟲寂霜嚴萬植枯
天圍平野濶雁入大荒孤
晚節身何補西風病又蘇
十年筇竹杖到處信君扶

寒水

寒水清難睡晴雲薄似紗
鴈飢窺兔窟蝶晚戀菰花
夕露麻糍溼西風草笠斜
孤吟殊冷淡祇此是生涯

飲酒

壘塊殊難遣尊罍強自寬
戟喉村酒辣沁齒老齏酸
駕瓦霜應徧泥鑪火亦寒
杜陵遙酌汝吾道果艱難

拜史閣部墓

占冢鬱然異燐光燭斗杓
羣兇傾大厦一柱折崇朝
白日

骨歸何處青天赋大招衣冠應自舉夜向孝陵朝

聞王孔昭欲過訪詩以促之

落落孤村靜人蹟蕭蕭籬壁動天風數椽茅屋似封繭
一卷杜詩如守宮過我空聞乘逸興遲君不至寄詩筒
欲爲訪戴應須早寂寞愁懷待爾攻

晚抵清風店

謾怪塵容太瘦生風雲變幻旅魂驚震雷又度千山雨
斜照微分半壁晴僧泛紫茶畱客住柳排青眼送人行
尋常愛讀湖州句惟有清風不世情

七夕

卷盡高樓倚翠螺憑闌堅坐看銀河蟬吟秋調欺孤客
風動微涼妒袷羅著葉有光知露下入雲無影見鳥過
天孫遮莫無邊巧將柰狂奴不乞何

擬古宮詞

鳳輦遙傳入建章殿前七十二鴛鴦玉階秋冷裁明月
寶帳春濃醉海棠錦瑟倚歌排雁柱晶盤行鮪斫鱗肪
縣知正殿鋪筵處絳節仙人捧玉皇

景陽樓上叩晨鐘蝴蝶君王不再逢井轉轆轤牽玉虎
門開閭闔啟銅龍霓裳欲換薰香嬾雲鬢纔梳照鏡慵
昨夜月明何處好平陽歌舞豔芙蓉

奉懷錢香樹先生

華國文章經國才
崇階曾拜少銀臺
萬方封事黃門奏
三輔人倫玉尺裁
桐杖久隨腐翼去
霓旌應逐浦帆來
鴉啼鈴閣無消息
午夜寒芒囑上台

日向高原望旆旌
東山不起奈蒼生
扁舟曾載鬱林石
朶殿應遲革履聲
范蠡湖邊劈紫螯
裴休宅畔破霜橙
何由得侍滄浪釣
黃蘗西風無限情

效唐人病馬詩呈香樹先生

意氣當年許漉注
可憐此日瘦查牙
雪埋月旋侵官印
土蝕連錢暗五花
病骨料難邀錦障
蹇蹄誰復換嬌娃

自慚辜負孫陽甚嘶向天邊玉筍斜

春日懷九兄

春水茫茫欲拍隄萋萋芳草綠將齊千林殘雪鶯聲澁
萬里閒雲雁影低宦海有波同塞馬靈臺無染笑醺雞
清明欲近人歸也好共攜壺過柳溪

秋園道上

慚愧秋園十上身更從苦海問迷津謾愁塵世無知己
只恐青山解笑人草窠吟蛩聲未老秋濠官柳綠猶新
僧藍老去渾相識茗椀殷勤勸客頻

渡淮

西風一葉渡淮船
衝破琉璃萬頃烟
帆帶歸鴉投浦樹
梢搖秋夢入江天
浮家泛宅三生願
洗耳臨流此日緣
何處柁樓吹暮笛
驪龍正抱領珠眠

揚州

垂老幡然作壯遊
竭來淮海古揚州
萬家鎗火連瓜步
一片蒲帆下石頭
南浦烟霜蘼芡老
西風砧杵雁鴻秋
燕城不少興亡恨
弔古還應上酒樓

渡江

岷峨下注向東傾
直到荆揚怒未平
勢蹴三山連蜃氣
波搖兩岸亂鐘聲
好風翦渡金山寺
宿霧遙開鐵甕城

我是瓜牛廬裏客茲遊眞足冠平生

妙高臺眺望

佳名不枉妙高臺豁達江天四望開
輕毳浮空孤鳥沒大聲吹地早潮來
漂搖身世波間梗少壯心期劫後灰
目力窮時東極盡遙遙一髮似蓬萊

俠客行

贈君一古劍兩刃明霜雪莫將龍虎精
輕染庸人血

清明

白楊蕭颯古原空祭掃人歸落照紅
骨到黃泉無貴賤大家消受紙錢風

昭君

玉貌凋殘朔漠風
龍沙萬里戍樓空
自關妾命薄如紙
不願官家殺畫工

淮安晚發

燈火河塘十萬家
橹聲人語兩嘔啞
千帆竝向東南發
五兩風痕一向斜

廿四橋

咫尺雷塘路不遙
月明無復玉人簫
李花也逐楊花盡
那更傷心廿四橋

夜景

月輪低亞玉繩斜料峭尖風戰齒牙萬卉埋頭都睡熟
只應凍醒玉梅花

儀徵早發

鑿鑿戍鼓響津頭杳杳鐘聲出寺樓好是曉風殘月裏
夢隨飛櫂下真州

渡江

一條天塹落雲間萬古滔滔逝不還欲問南朝香豔蹟
隔江笑指秣陵山

國朝畿輔詩傳卷三十四 終

國朝畿輔詩傳卷三十五

長洲陶

樸菟薌輯

寶坻高繼珩寄泉校

王今遠

今遠字用晦曲周人乾隆元年進士官山西垣

曲縣知縣

和勞公擬張茂先勵志詩卽用原韻呈毓英院長

兼示同學諸子

翳惟上古睢盱居遊哲人有作謀式用周志窮徂夏心
怛凜秋曜靈屢餞鸞輪倏流

其流伊何心與物化豈無良材閱榮則謝情亦勞止思

以中夜毋以坐馳靈臺是舍

厥賦不移沈鱗浮羽翳我人斯而弗能舉惟鑑有光絲則有緒以理以磨以納於矩

先民是程不遑暇逸毋眊而精景光竝日譬是經涂悴於沮漆壁極與栴蘊崇厥質

厥質之崇鬱蔥其林崇柯蔽帶亦集鳴禽敷華落實植幹因心以勤則獲無謂遙深

鳳凰飛矣足亂浮雲元豹眠矣霧隱潛文若時播種歲事之勤於以刈穫終畝之殷

載負之塗弗辭以清誰云昭昭逝異冥冥曰虛以受損

乃於盈君子鑒止闕耀韜聲

我聞在昔事有攸起相彼千霄萌蘖所始資此夙知縮
從淵理足下之行可以千里

肅肅顯命大生維仁若彼鱣鯢橐籥洪鈞叩景答響窮
奧知新尊學尙矣式德由人

張惟寅

惟寅字子畏號惺夫南皮人听曾孫乾隆元年
進士厯官浙江鹽運使改福建汀漳龍道

重陽

斜風細雨送新涼籬畔寒花滿院黃愁上高樓舒望眼

滇南今日又重陽

朱嘉善

嘉善字懷遠號怡齋天津人乾隆元年進士官
刑部員外

西山晚步

沿溪芳草費幽探山色青青滴晚嵐竹外桃花花外水
水雲深處結蘿菴

蘇鶴成

鶴成字語年號野汀交河人乾隆二年進士有
野汀詩稿三卷

陳鴻舉蘇公墓志先生幼穎慧年十五通春秋
三禮乙卯舉於鄉丁巳成進士有至性母柴太
孺人病風不能言先生扶持抑搔悉中親意父
北流公卒於官先生匍匐奔喪間關萬里出沒
風濤間數瀕於危卒得扶柩歸葬人謂先生誠
孝有以感之也繼遭太孺人憂絕意仕進居恆
遇人長厚持已恬淡高密單雨莊公鄉
試薦師緣事戍臺公爲捐金納贖得歸

惜春

惜春芳序晚岑寂淡幽情補病休資藥非才敢近名雲
歸三徑暖花落一村晴望盡林臯外乘風社燕輕

戊辰冬日早發廣川感懷寄表兄劉艾園

羸馬嘶風堊畔行雪霜天曉重含情威稜萬里青油幕
黯淡重關白草營帶劍古來推國士操觚眞可愧書生

投閒置散非徒爾才地如君定晚成

西陲用兵計日奏捷

去年與劉艾園汲泉共飲今年余客南皮渡河歸來感而紀之

憶酌寒泉沁齒牙馬嘶高柳避塵沙無端一夜霏微雨
開徧沿村苜蓿花

曹雲昇

雲昇字慕庭號履平通州人乾隆二年進士官

湖南保靖縣知縣

潘汝炯傳公生而穎悟六歲讀書數行下十五補博士弟子員學使長洲吳荆山先生器之幸安化遇盜治民政聲卓卓有吳姓弟兄九人以析產訟而暮夜饋金者公卻之判令式好如初

九人感泣雍正六年改土歸流熟苗之黠者多
緣屯口爲奸欺生苗不識漢文稍犯法輒陷以
重辟公超
雪數百人

徐飛山舅索梅花詩帖

寒燈寂寂照清愁蕭灑詩人小竹樓爲愛梅花歸思苦
空飛清夢到羅浮

邊中寶

中寶字識珍號竹巖任邱人乾隆三年舉人官
遵化州學正有竹巖詩草四卷南游壘篴集一
卷

遵化州志竹巖彈心經史見聞該洽由拔萃補
任縣訓導登乾隆戊午賢書癸酉遷遵化州學

州志著有遵庠勸學詩

王錡序竹巖先生以淡泊淳古之質安雅淵穆

之度耄而好學日手一編弗輟故發為詩也如

瑤琴不帶逸韻鏗鏘豐而不失諸靡約而不

失諸促極性情之發越而體裁一歸於正

陳步瀛壘篴集序歲辛卯霽峯觀察常鎮隨園

先生聞東南山水之勝遂欣然與竹巖並轡南

行其唱和詩曰南遊壘篴集余讀之竹巖則直

舉胸情絕去瑀飾古質深厚有次山篴中之遺

風隨園則豪快奔放寄托深遠長篇短什觸緒

紛來與竹巖先生不同其音節而同其意匠所

遊北固甘露寺登臨江亭眺望

官解意不適肩輿出北郭過橋折而西迤邐緣城壑行
行纔里餘峭壁陡如削旋繞到山椒盤磴陟蘭若寶塔

鐵鑄成九級儼阿閣江山推第一大書吳琚作絕頂有
高亭軒翥盤空鶴金焦左右蹲夾輔連脈絡繚繚無際
涯巨艦風漂蕩東接海門潮三山祇隱約迴首顧西南
風物復不惡高低隨地勢溝塍互參錯峯巒相蔽虧烟
霞足領畧此心役於形馳驟而束縛置身千仞岡翛然
遊廣漠長嘯凌天風空色兩無著

逍遙堂感兩蘇故事因寄舍弟

堂踞府廨後廳之左坡所憩也潁濱曾信宿於
此序云轍幼從子瞻讀書未嘗一日相舍旣壯
將宦遊四方讀韋蘇州詩有云那知風雨夜復

此對牀眠惻然感之相約早退爲閒居之樂其
後子瞻遷守餘杭復移守膠西而轍流滯於睢
陽濟南不見者七年熙寧十年二月始得相從
彭城留百餘日時宿於逍遙堂追感前約作詩
云逍遙堂後千尋木長送中宵風雨聲誤喜對
牀尋舊約不知飄泊在彭城余讀此感二蘇兄
弟會宿逍遙而惜隨園之未能偕來也寄以詩
來徐憩息逍遙堂坡翁舊宅供徜徉潁濱從兄到此地
當年風雨相聯牀兩蘇從幼未相舍七載遊宦分飛翔
嘗讀蘇州對牀句惻然感動心悲傷夜眠誤喜尋舊約

不知飄泊彭城鄉我誦轍詩並小序不禁含涕盈雙眶
時事不同情則合鵲鴿迴首潛悽愴吾弟隨園從姪請
此遊與我相扶將誰知啟行期已定病馬還怯馳康莊
我來兀坐堂簷下三面拱抱環迴廊偏左有池石鑿鑿
渟泓一鑑魚洋洋池上小山頗奇秀磴礪盤曲形低昂
高者昂頭蹲虎豹低者伏地如羣羊更多花木難悉數
最憐謾謾叢蒼筤知是東坡位置好壘簾迭奏諧笙簧
安得惠連一至止此心偏側恢開張

月下賞杏花用東坡月夜與客飲酒杏花下韻

寒食倏過入暮春逍遙堂邊月窺人竹樹滿庭橫斜影

朗如平水浮青蘋見說龍山杏早發昨宵風捲紛飄雪
檢得好枝插膽瓶主賓對吸杯中月把杯長嘯月明中
眼前花事色耶空吹簫作賦人已矣珍重一枝杏花紅
哭井氏姊

死別終須有何期竟此辰初聞驚若夢慟定恍疑眞佐
餽卮匪在招魂菜麥陳最憐歸嫁後久作未亡人

寄半壁山巡司黃泰初

曾聞蘿峪外風物遠囂煩虎臥空山道猿啼古樹村庭
閒常設網衙散早關門我欲尋仙吏高齋對舉尊

日曛

羣動隨暝息窗前晚夢迴杖藜緣曲徑移榻上平臺風
細池微縐秋深菊未摧興來呼阿段聊覆掌中杯

卽事

杖藜行郭外信步入招提老樹垂龍爪高牆砌虎皮山
光搖戶牖水色淡淪漪欲證西來旨長懷惠遠師

隰苓兄旅櫬歸自江西詩以哭之

落寞詞壇憶舊遊當年康樂最綢繆祇緣訪勝滕王閣
詎料修文白玉樓燕士悲歌聲已歇卞生懷壁涕空流
南天招得魂來否聊爾題詩慰首邱

和雒秋水九日作

吳江楓落客心驚，節屆重陽百緒并。
饒有白衣將美醖，更無黃菊泛秋英。
太行蒼淡山容老，大陸蕭寥水氣清。
極目鄉關鴻雁少，知君登眺不勝情。

日暮歸自焦山

暝色空濛海氣涼，舟回京口別焦光。
四圍深樹留清嘯，一帶輕帆挂夕陽。
放眼江天真灑落，迴頭塵壤底奔忙。
鳳凰樓下今宵夢，定向蓬瀛一葦杭。

秋夜雨中

疏雨灑秋窗，微聞花落片。
無語對寒檠，雲邊一聲雁。

曝衣臺

遠望曝衣臺空濛滴烟霧昔年紅葉深我友從茲去

說法亭

酌酒彈棋憶昔遊丹楓飄葉衆山秋亭南峭壁縣千仞
記我題詩在上頭

魏大名

大名字伯啟號復泉南樂人乾隆三年舉人官

廣西北流縣知縣有一簣山人詩草四卷

蔡以成序集中諸作皆有得於溫柔敦厚之
遺而盤鬱蒼古渾深雄健直欲方駕盛唐

飲趙可亭郡齋

荏苒驚離緒朋簪又一時長歌開篋櫝深感及鬚眉清

許壺冰近歡應竹葉知廿年慚小友回首負心期

南皮柬同年張滕縣紹言

風埃無定跡劍合忽高軒梅雨分征袂辛盤共舉尊
年流水逝深話夜燈繁總任還歧路良時惜晤言

移寓別吳蓀圃

對牀逾半載惜別若爲情不謂萍蓬蹟能堅金石盟
竹枝吟粵嶠薇月話西清聚散尋常事偏令惆悵生

過許鐵山工部舊寓感懷

旅館重來涕欲橫西風殘照不勝情隔年日月分今古
異地神魂誤死生畫省詩名留宇宙江關循績動公卿

花欄苔徑知惆悵更過遙天斷雁聲

檢笥中得亡友崔南廬詩有紗帽定如何句泣然

題此

桂榜當年竝蘂新聯輶碾破帝京塵久從黃卷憐懷璧
猶向烏紗笑積薪淨世風雲歸石火空山松柏冷冰輪
故園今作西州路觸迂遺箋已愴神

濟寧道中

微茫三五星殘月垂荒野已聞隴上人鞭牛烟際語

雨後馬上口占

輕塵不動柳陰斜隄外芳疇極望賒生意一鞭看不盡

調風吹徧馬蘭花

至京

又騎羸馬踏京塵二十年來笑此身惟有西山青不改
黛眉猶似舊時新

視板橋道路晚歸聶山營

白浪河頭雨過涼北風雲氣隱山莊暮霞返照青疇外
蕎麥花開白似霜

紀晉

晉字企瞻文安人遷宜子乾隆三年舉人官江
南甘泉縣知縣有寶樹軒詩二卷

李中簡紀公墓志企瞻戊午舉於鄉壬戌以明
通授祁州學正俸滿遷邑令得江南之當塗調
桃源辦災賑請開倉不俟報牒全活無算旣而
堵禦大塘河水明年督捕蝗蝻與民夫兵弁雜
作歲以無害調甘泉甘泉爲揚州附郭縣水陸
之衝號爲難治公下車而商民帖然過邵伯湖
知二牐將壞急牒請當道爲先事防或阻之不
果已而牐陷隄壞部議落職遂卒年五十有二

望黃山

稍畦錯落野田間近水人家綠竹環閒坐籃輿恣憑眺
亂峯缺處露黃山

秋夜

翳翳輕陰拂院牆夜深襟袖覺微涼綠窗隔樹月來晚
清露滿堦花氣香

劉元鼎

元鼎字鼎臣號梅村棗強人乾隆三年舉人官
廣東候補縣知縣有梅村詩草

雜述

灼灼窗前花鬱鬱園中樹一夕嚴霜飛芳華邈難溯人
生數十年候如草頭露立身不及時奄忽非我故願言
懷良朋流光惜蟾兔

蒼鴈善攫鴈貪肉爲人使雞鶩爭朝餐卒以供甘旨溫
飽志不存網弋徒爲爾不見鴈與鵠一舉在千里

登廣陽城望西山

獨上高城百尺樓。西山風物眼中收。參差古黛連峯起。
縹緲晴嵐壓檻流。隔樹猶憐青草合。望鄉惟見白雲秋。
何時絕頂憑臨眺。一覽蒼茫破旅愁。

徐金楷

金楷字端叔號春卿天津人乾隆三年副貢生
有步青堂餘草

津門詩鈔春卿先生少年
英俊以中副車憤惋卒

喜雪
用禁體

幾年歲歉冬無雪。九十寒威吹土裂。今來麥隴又塵生。
何處農人不愁絕。元陰忽作天地荒。靜夜如聞松竹折。

攬衣未敢意紛披
執火初然見明滅
就觀砌下已深深
仰視簷前方屑屑
旋將嘉兆慶桑麻
預信豐年恣口舌
平明踐素出通衢
近午衝寒尋巖嶂
郭外春萌彭澤田
山間陽起仇池穴
恨無綠萼鬪新輝
祇有清辭追古哲
歐陽近體一爲之
白戰何曾持寸鐵

徐垣

垣字紫庭號芷汀
大興人乾隆四年
進士歷官貴州布政使

漢川道中

古色晴川路孤篷
遠客舟江聲連夏口
帆影入荊州臨

水村成市沿堤樹欲秋不堪聞畫角日暮又勾留

荊州懷古

英雄爭戰有時休巨鎮天開楚上遊荒砦於今空壁壘
霸圖何處問孫劉帆檣影帶巫陽雨草樹聲含鄂渚秋
憑弔興亡已陳蹟嚴城寒漏動鄉愁

紀宣猷

宣猷字次辰文安人遷宜子乾隆四年進士官
河間府教授

柳園獨步

擘絮雲銜晚照黃寒林投隙一徜徉蘆葦敲淺瀨浮花冷

松裏危欄墮子香祇我扶筇舒望眼更誰搜韻入詩囊
小春已逼年光老往事如塵付渺茫

周人麒

人麒字次遊號晴嶽又號衣亭天津人乾隆四
年進士官翰林院檢討

辛巳大水感懷

一自黃花著夏槐朝雲暮雨遞相催雨傾天漢常時決
雲鬪蛟龍總不開兩月霖霖迷晝夜千年老樹拔風雷
棲禽何處沾餘粒鳴噪紛紛枉告哀

孫坦

坦字白昭順天人乾隆四年進士官知縣
津門詩鈔公幼慧九歲能詩性方正不苟規
步繩趨人每笑其迂後宰一縣頗著政聲云

送別錢香樹

離情爭似柳條柔說是南歸不可留兩岸鶯花三月夢
一帆風雨半囊秋相逢畢竟誰青眼吾道於今付白鷗
去去有懷君記取新詩草斷寄江頭

田志蒼

志蒼字東山號春曉大興人志隆弟乾隆六年
舉人官甘肅燉煌縣知縣有翹羽堂詩草

道中口占

落落四方志空爲汗漫遊驅車慚下澤跨鶴鄙揚州野
陌橫耕犢荒村間戍樓西風瀟灑意吹老一林秋

睡起

除卻詩魔更睡魔殘書禿管奈人何縱教狂不因窮減
可禁愁偏爲病多賣賦相如文自富閒居潘岳鬢先皤
曲成四顧誰當和入望雲山供浩歌

張璫

璫字智珠號平林高陽人乾隆六年拔貢生歷
官雲南嵩明州知州有平林遺稿一卷

紅豆樹館詩話平林先宦甘涼後宦滇洱往來
黔蜀間詩多寫邊徼風土五言如黔中云伏弩

穿熊掌縣刀斲勝臍山嵐晴亦雨天氣裏如秋
川江云層灘坡走馬急溜箭離弦七言如隨永
都護校獵云霜刀截腋雄狐暖玉腕調羹野雉
肥壇廣貼地霜華白絳節凌霄柿葉紅凋弓斜
挂天山月班馬長嘶瀚海風蘆花鴨綠浮春
水茜草猩紅帶夕陽氣韻沈雄殊有風骨

黔蜀道中紀程

石路疲征馬涼颼蕩客襟天空晴日淡澗古暮雲深紅
葉千山錦黃橙一樹金寒衣驚歲晚處處急清砧

輿圖歸版籍千羽格苗民畫虎驚山鬼封羊拜水神鴻
蒙渾欲闢桀驚漸能馴聲教同中夏爭知有聖人

雞聲催夜起續夢抱窳眠塊磊思鞭石淋鈴欲補天乾
喉愁毒水楊腹望炊烟指點前村路心旌竟日懸

羨汝爲農圃空山結草堂蜂鬚粘蜜潤雀舌噪梅香不
井泉通竈無椽竹葺牆野人居別業高枕臥羲皇
邊境無淫祀馨香薦武侯獐獐陳俎豆樵牧護松楸祈
雨嘉禾茂呼風瘴氣收野芹椎魯性石像奉千秋

工部長羈蜀升菴久戍滇高才爲世重勝地仗人傳詞
海三巴浪文峯六詔烟星輶經過處擊鉢愧前賢
臨邛初駐馬紅葉正秋深不見當壚面原無滌器心山
河丞相表風雨少陵吟懷古情何極旗亭酒自斟
割據終何益跳梁總是癡公孫空躍馬孟昶自降旗玉
壘雲歸處峨眉月吐時攜來茅店酒朗誦草堂詩

題工部草堂

往事談天寶空堂草色新無家長客蜀垂老不歸秦
法律拈時細精神到處真六朝徒綺麗風雅振斯人

川江放舟

昔說瞿塘路今經灩澦堆水由三峽瀉山是五丁開
巨浪連雲落靈源到海回風濤休畏險自有濟川才

成懷祖

懷祖字尚義號北樵大名人又昭子乾隆六年
拔貢生官陝西邠州州判有關西橐草四卷

大名縣志懷祖官邠州時灘田淪於水者出其
賦攝長武篆清奸蠹省糜費準夷之役隨辦軍

需局事蹟山積檢之不時得懷祖類晰而標
目之三曰而畢爲總督劉文正公統勦所重
汪師韓序北樵詩骨峻而學邃風清而節和一
掃割綴浮剽之習負焉絕塵以繼著觴之集庶
幾雄視
河朔矣
紅豆樹館詩話北樵負經世志歷攝三水長武
永壽三原諸縣皆有去思性簡淡不慕榮進故
浮沈冗官中十餘年而卒在邠嘗脩公劉墓范
文正公祠撰邠志續筆一書晚始爲詩追蹤唐
賢稜稜露爽不
拾過庭餘瀋

對月

更閒真似隱寒柝靜宵分明月空廊得哀鴻獨夜聞風
吹松作雨山縱火燒雲幽境誰知者孤吟寫斷紋

蒲澤谷

宋潘邠老讀書處

蕭蕭蒲澤谷邠老舊詞壇七字古今絕滿城風雨寒薜蘿溪外影蟋蟀月中殘已矣先生蹟長懷向夜闌

題三水縣署

小邑藏深塢孤城千嶂間花殘尉遲宅

城北地名看花宮爲唐尉遲故

第雨暗石門關日進諸生課官仍別駕閒市聲雲外落烟火半懸山

歸鳥

歸鳥寒梅樹勞人淚滿裾孤蹤千里外一夢十年餘日與病相約交因貧漸疏懷鄉驚歲晚風雪暗吾廬

送陳元聲太守之任滇南

雁飛不到處萬里肅閒關雪棧連三輔雲旗下百蠻猿
啼巫峽雨人向碧雞山絃誦傳梅句弓衣織幾彎

長安懷古

依然北斗挂城邊奕局長安憶往年英武飛騰天上策
郎當哀怨隴頭絃兵歸中尉空惆悵疊起諸藩幾變遷
太息昭陵餘六馬蒼茫斷石臥秋烟

出關

千里西風雨擔書青山白髮感何如關開曉月霜飛遠
河捲驚濤夢醒初雞肋不堪回客味鴻泥今許覓吾廬
歸來矯首柴門晚過眼烟雲倚杖餘

酒泉幕府漫題

帳偃牙旗夜色蒼
公餘岸幘坐焚香
怨飛塞笛春無草
醉染弓衣墨有霜
敢道太沖終記室
可憐公穆卽戎行
燕南豪氣平邀月
影落天山雪壓牀

拜范文正公祠

一勺西湖碧草侵
薇山幕下暮雲深
兩宮調劑朝廷淚
二輔焦勞父子心
遺像當年通絕塞
靈祠終古對寒岑
每從瞻拜懷前哲
風雨殘碑不憚尋

寄懷吳三牧村

雪滿溪橋未放梅
一函書報故人回
饒君湖海三年夢

負我鶯花二月杯
山寺尋詩雲外屐
龍窩聽雨石邊苔
而今獨對題襟集
瘦影殘鐙空迥迥

雪後寄懷靜宜牧張智原同年

香破龍團液玉塵
松窗光射地氈熏
吟從雪夜狂如許
瘦比梅花賸幾分
此夕人同千嶂月
倚樓目斷六盤雲
山陰清興誰能會
手寫溪藤寄與君

送陳竹泉南旋

二月風光上柳條
片帆斜挂雨瀟瀟
行人板渚聞鶯處
春到揚州第幾橋

張 穎

穎字晴嵐獻縣人乾隆六年拔貢生

謁漢獻王陵

賢王今不作望古拜陵園秦火經時滅斯文異代存
春秋憐帝子俎豆薦江蘩別有儒生淚年年灑墓門

登塔山過宜遠宿七里坡

策馬陂陀裏登高望眼開雲中千鳥沒海上片颿回
水近涼先到山多雨易來晚投烟火宿旅興托村醅

登麴義壘

界橋憑眺悵何依舊壘荒涼帶夕暉澗水西來湖正落
蕭陵南去雁還飛公孫霸業兵戈息河北雄圖戰鬪稀

愁絕臨風更懷古當年萬馬蹴重圍

王太岳

太岳字基平號芥子定興人乾隆七年進士官

國子監司業有青虛山房集二十四卷

王昶王公行狀公以乾隆六年辛酉舉於鄉明年壬戌成進士改庶吉士十年授翰林院檢討十五年充日講起居注官十八年充江南鄉試副考官十九年授侍講轉侍讀充會試同考官二十年七月補甘肅平慶道二十三年調西安督糧道三十三年擢湖南按察使三十六年調雲南按察使三十七年擢布政使是年以審擬逃兵寬縱落職四十二年命在四庫全書館為總纂官四十三年仍授檢討四十七年擢國子監司業後三年而終年六十有四子一芾公以弱冠入詞林海內交推其文學而公獨志於經世之務所至必爬梳剔抉據今攷古

咨民疾苦而討論之在平慶及西安皆有惠政
尤留心於水利著涇渠志三卷及在雲南閘銅
政之弊於是旁搜博訊指利害所由來以求補
救之術大畧謂舊時滇銅聽人取攜自康熙四
十四年始請官爲經理歲有常課至雍正初始
開鼓鑄運京局以疏銷積銅茲銅路已深近山
林木已盡夫工炭價皆數倍於前而又益以課
長之措克地保之科派官役之往來供億厥民
受價六兩四錢之外尙須貼費一兩八九錢而
後足採辦之難此其一也滇銅自乾隆四五年
以來歲產六七百萬勛乾隆三十八年三十九
年以一千二百數十萬告此滇銅極盛之時至
今日而京師之運額旣不可缺而江南江西以
外尙有浙閩黔粵秦楚諸路開鑄求之益衆責
之益急雲南之銅何時足乎採辦之難此其二
也銅民皆無業之人領本到手往往私費亦有
開銅無成虛費工本懸項累累名曰厥欠自頃
定議每歲終賁取無欠結狀然工本不足厥民
不能徒手枵腹而致採則爲之量借油米鑪炭
以資工作而其欠借不歸之油米鑪炭亦不下

巨萬之值大廠之通累積重莫蘇採辦之難此
其三也小廠收買渙散莫紀合計數十小廠之
銅比二三大廠不能半則大廠安得不困採辦
之難此其四也若夫轉運之難牛可載八十觔
馬力倍之一千餘萬之銅非十萬匹頭不辦今
司運之官既皆增價僱募然不免以人易畜里
民每歲數日之糧以應一日之役喜事之吏驅
率老幼橫施鞭打瘁民生而虧政體非小故也
嘗竊求前人之論議其有已效於昔而可試行
於今者口多籌息錢以益銅價也通計有無以
限買銅也稍寬考成以舒廠困也實給工本以
廣開採也預借僱值以集牛馬也銅政之要必
寬給價給價足而後廠衆集廠衆集而後開採
廣開採廣則銅多銅多則用裕有銅木斯有銅
息有鑄錢斯有鑄息以賑民之銅鑄錢卽以鑄
錢之息與廠費不他籌澤不泛及而此數十廠
百千萬衆皆有以蘇困窮而謀飽暖其歡呼
翔踊之氣銅卽不增亦斷無減雲南山高脈厚
到處山壑彌砂但能經得宜非惟裨益銅務
而數千萬謀食窮民亦得資以生活由此觀之

小廠非無利也誠使加以人力穿峽成堂則初
開之礦入不必深而工不必費又地僻人少林
木蔚萃炭亦易得較大廠攻採之費有事半而
功倍者誠於厥之近邑招徠土著之民聯以什
伍之籍又擇其愿樸持重者爲之長於是假之
以底木益之以油米薪炭則渙散之衆皆有所
繫屬然後示以約束董以課程作其方振之氣
厚其已集之力使皆穿石破峽以求進山之礦
雖有不成者寡矣銅運之在滇境者後先踵接
依次抵瀘而瀘州旋收旋兌畧不停息則終無
儲備之日惟寬以半歲之期會然後瀘州有三
四百萬之儲儲之既多則兌者方去而運者既
來是常有餘貯也如是而凡運官之至者皆可
以時兌發次第啟行在瀘既無坐守之勞在途
亦有催督之令運何爲而遲哉疏上不果行其
後銅政日益困弊始取其說稍稍用之然亦不
能盡也是以滇之官吏至今莫不誦習其書公
二十六歲喪父事母色養四十年如一日宦轍
所至必與版輿俱比居太夫人喪年已六十一
矣哀毀一如少壯者性好朋友與同年邵君齊

肅鄭君虎文尤善寓書往復率以文章道義相
劇切每別必涕泣不自已蓋篤於行誼如此公
言經兼訓詁論道學兼取陸王詩文自魏晉迄
於唐之杜韓柳皆擬其形容而契其意旨有芥
子先生集凡

二十四卷

蒲褐山房詩話先生詩宗魏晉下及唐人醇古
淡泊可稱高格生有至性每言古來忠義事輒
爲感慨流涕卽觀劇亦如之與邵叔山鄭誠齋
顧密齋諸同年以文字相劇切才名甚著及自
雲南罷歸後直四庫館授司業
居海淀之太平莊憔悴以終老

曹學閔書王芥子前輩涇渠志後詩史志重河
渠經術通治體須用讀書人尤貴識時士我讀
涇渠志歷歷如聚米鄭白在當年豈不稱利美
奈何後世入尋源不究委古今既異宜山川亦
移徙但知耀其名不復問彼此邈使好事者披
圖費條紀嗟哉萬夫役那堪試疑似百萬口嗷
嗷一人功自喜疊疊涇渠岸巍巍豐碑峙唐宋
及元明利害俱可指徵引旣淹雅識力尤俊偉

上下數千年分肌而劈理洞達古今情匪侈言
導水不利以爲利其利斯大矣我生清晏時竊
自愧愚鄙歷考利病由較然著前史紛更熙豐
朝非不用周禮清靜載寧一其言出老子厚實
與名高或相倍蓰乃知聖人言長府何必改
勿慕匡時才勿遺他日悔願言爲治者涇渠志
謹
紅豆樹館詩話先生官雲南時有功銅政甚偉
渙人思之先是昆明縣五華書院中祀鄂文端
公爾泰楊文定公名時尹文端公繼善陳文勤
公宏謀李恭毅公湖明將軍瑞爲六賢祠至是
以先生附祀更名七賢蘭泉司寇爲撰碑記蓋
乾隆戊申歲也詩五古最工取法初唐近體亦
清蒼
拔俗

讀史

漢祖戮功臣本圖磐石安豈知禍所伏近在蕭牆間牝

雞一司晨翰音遂登天炎劉幾化呂抔土殊未乾產祿
實昏駭平勃勳爛焉倘其遇莽操何計能圖全乃知牀
第私匪惟因庸孱由來蓋世氣半消兒女前李唐武后
禍亦兆貞觀年文皇豈不偉貽謀何訾然千古同一慨
覆車無後先關雎謹妃匹信爲王化端

于孟起宿衛綽有古人風寅恭著夙夜進止何雍容六
尺既有託四海無兵戎一朝臨大事隻手迴蒼穹淩烟
標霍氏遠紹伊且蹤功成不知退震主威隆隆終爲兒
女誤弱與弑逆同滅親昧大義禍發還覆宗信哉貴學
術臣節庶克終

黛流村新營所在

昔予點朝簪本自滄洲吏一辭京雒塵適會田園志卜
築代巖棲嘉招慚遠志遂賃伯鸞春頗授揚雄宇林間
結架小郊扉晝常閉灌溉發陽翹荒鉏豁蒙翳翦彼惡
木陰暢此芳菲意非惟娛徂年兼得閑外視支杖聽風
簷披襟納山翠片雨洗青天寥寥元古思

種藥

結廬近塵陌獲與田夫齒蒲杏日專與農候茲焉始余
方據槁梧素業亦時理荷耒竟不任聊欲勤四體鋤瓜
夜雪餘種藥春陰裏酌以長生瓢注之功德水豈不念

朝飢好事良自喜擾擾區中緣遂性亦云已

雜興

白日照大野晨登昭王臺邱陵翳喬木望諸安在哉四
運各有極今古相推排聖傑與曠愚千秋共蒿萊英爽
故不沒聲光彌九垓豈知沙蟲化冥昧隨颺埃

夏歲沒已久周道復淩夷棲憤息既駕楚狂哀鳳衰素
王炳鴻業六籍天章垂殷勤覺來禋豈爲青紫媒後儒
抱遺編未必游夏齊戚戚憂貧賤動傷不逢時碩人貴
養素衡門可棲遲彈琴咏王風此樂誰當知

有鳥樂盛春鳴聲何揚揚鳳凰不如我振體皆文章元

冥鴈殺氣百蟲同蟄藏毛羽一時盡無計凌風翔玲琳
睽雛匹寸步不得將平生羞燕雀飛搶徒榆枋於今竟
何如怒焉情內傷

去聖日已遠狂狷世亦希胡廣號中庸但爲時所嗤言
行滿天下安得無怨訾良玉不掩瑕輝光燦虹霓偏人
誠卓犖足爲濟用資富貴固尙來遭逢會其時下士罕
知命謂云術取攜可憐長樂傳千載更相師

喬松多節目乃是梁棟姿社櫟大蔽牛郢人棄如遺鸚
鵡好爪觜飛鳥故不離羝羊羸其角空復蒙虎皮取人
以言貌孔聖猶失之學禮本忠信詎止昭令儀君子尙

國朝畿輔詩傳

卷三十五

三

持操周道無多歧毋言居一室萬目環相窺

陌上纍纍墳不知誰氏阡衰榮萬千族冥漠同幽泉富貴苟可致亦欲娛當年時命不我與空勞懷執鞭喬松亦安有但駭虛聲傳沈飲謂忘憂未死先長眠惟有強爲善引鏡無慚顏琴書陶永日百年隨化遷

歸興行去雲南作

歸與歸與曷不歸頽雲倦鳥難復飛住世尙憐皮骨在到家亦恐親鄰非此身幸復爲我有尋壑經邱總高厚未論今是與昨非已喜山鶯來勸酒平生慷慨頗自奇亦欲小補名當時年衰鬢禿轉碌碌身廢中道人何裨

三年坐嘯滇南陲
漸見滿眼還瘡痍
幾時重省舊城郭
不辭化作丁令威

試鐙日獨酌徑醉短歌自嘲

笑我支離柳生肘
那復塵埃倣趨走
門前簫鼓競催鐙
屋底僵眠初中酒
二頃原羞負郭謀
一錢何必看囊有
但畱老眼閱時人
杖藜且立三叉口

春日就李東木孝廉館舍沾醉畱詩

西家一步地爛著
春風鞭我亦無羶
客君還乞酒錢好
山支榻對遲日藉
書眠頗怪便便腹
長饑更幾年

經橋山下寄懷一二遊侶

尚識橋山路驂感舊經人衰霜徑草客散曙天星日
暈嵐烟紫秋陰石氣青蕭條懷古意誰共叩巖扃

奉酬叔討從兄見過之作

王城車馬路尚愛野人廬石隴看雲坐春畦撥雪鋤自
憐頽放慣人許往還疏所賴吾宗秀時時問索居

秋朝晏起吳百藥見訪酌酒敘懷

涼飈下梧葉日夕滿庭墀清曉鳥啼歇巖窗人起遲倒
衣知有客解帶坐論詩世上紛微逐將無文度癡

歸自東臯得顧密齋學士書口號卻寄

看徧秋山又獨歸楓林樵徑晚風微寒原漠漠耕人語

烟渚沈沈浴鷺飛最有遠心當暮景共誰盡醉曲春衣
集賢舊侶能相問人在東臯賦采薇

隴右晚行寄京師故人

遠林如薺望中齊殘照荒荒向客低塞上驚沙還日夕
隴頭流水自東西逶遲道路看人面爛漫雲山信馬蹄
京洛故人都好在征車誰信似雞栖

晚歸東屯敝廬

林外春山綠一圍月明寂寂掩荆扉舊吟杜老無家別
賸有邯鄲故步歸鄰父好懷招近局兒童含笑繞春衣
廿年事業僧行腳海鶴虛勞怨蕙幃

早過潼關呈屠參政

日上關門宿霧收
角聲悲壯肅高秋
山連二華橫秦塞
水控三川下豫州
行處牛羊成聚落
人家雞犬共林邱
風流輸與屠夫子
深坐溪亭理釣舟

將歸

又逐東風倦馬還
征衫重理汗猶斑
夢畱碧草春波外
心盡孤雲落照間
到處有情惟燕語
一生多媿是鷗閒
卻看野寺僧歸晚
松月無人自上關

國朝畿輔詩傳卷三十五 終